

2 Jon

Nalobulat napolisulan na-vəha-ru-an aJon totesi van hən alat siYesu

Ase itos nalobulat egai?

AJon tovi ahai susur siYesu, gai itosi.

AJon itos nalobulat egai hən nəsa?

Itosi hən beṽusan alat siYesu hən naṽide hən ləb̄itoh, b̄on mai aGot mai nəvanuan tile gail.

AJon itos nalobulat mōs ase?

Itosi van hən alat lotokad nadəloman len aYesu Kristo len naut p̄isi.

AJon itos nalobulat ŋais?

Hum ma totesi len nasihau A.D. 90.

1) Na-ke-ivoi-an mai na-sor-tuṽ-an (1-3)

2) Nakitinan mai na-ləmas-buni-an (4-11)

3) Nə-maris-kotovi-an (12-13)

Na-ke-ivoi-an

¹Ginau, nəvanuan na-il-a-mō-an, nutos nalobulat egai van hən gaiug, Levet^a, aGot totabtabuh len gaiug, van hən gaiug mai anatum̄ gail. Noləmas bun gamit len nakitinan. Be savi ginau ŋai, galit p̄isi am lotoləboi nakitinan, loləmas bun gamito, ²bathut nakitinan itoh len gidat tabtab ale titah mai gidat vi sutuai. ³AGot teviol kəmas hən navoian mai gidato, nəlon titanjis gidato, nəlodato tikad natəṽat. Natgalen p̄isi legəm len aGot Tata mai aYesu Kristo tovi aNatun aTəman, ale datikad natgalenan len nakitinan mai na-ləmas-buni-an.

Nakitinan mai na-ləmas-buni-an

⁴Nukemkem masuṽ nəboŋ notosaḅ ləboii ke anatum̄ galevis lohusur nakitinan hum aTata tokele hən gidato. ⁵Imaienan nukel mai gaiug,

^a **1.1** *Levet* evi nasoruan sua sidato namilen napəhaṽut toṽat nəhes hum nasuḅ. Len naut egai, nəboŋ toke *Levet mai anatum̄ gail*, evi nasoruan tosusuah namilen toke naluṽoh sua len naut sua lotovi alat siYesu ei. Ale len naṽide tomaiēnan, len naut ṽisusua aJon toke *Litegai* am.

Litegai, ke, gidat dateləmas bun gidat gabag.^b Enan, nototosi van hən gaiug, savi nakelean veveu todaŋ, be datukade len natuḃatan. ⁶Na-ləmas-buni-an imaiegai ke: datigol nəsa aGot tokele. Enan evi nakelean todaŋ məttosəsəloŋ həni len natuḃatan, ale mitimashusuri. Məteləmas bun gamit gabag!

⁷Nəvanuan gəgəras isoḃur lupərŋan navile a pan tia, galit lomətahun ləḃikel ləboii ke aYesu Kristo egəm vi vanuan kitin tokad niben. Nəvanuan ideh tomagenan evi nəvanuan gəgəras, aenemi seKristo. ⁸Mətelələgau hən gamito hən asike nəsa dattoum m̄osi ḃimasig be hən məḃikad nakonḃurḃuran kavkav aGot totəgau gati m̄os gamito len nəmav.

⁹Avan ideh asike ḃitoh tabtab len naḃusanan seKristo, avil ḃivan masuḃ am, atenan, aGot satoh len nəlon. Avan ideh totoh tabtab len naḃusanan, gai ikad aGot Tata mai aNatun, gəlar ḃisi len nəlon. ¹⁰Imagenan, avan ideh ḃegəm hən gamito, be asike ḃilav naḃusanan seKristo gəm hən gamito, samtehəhaḃur hən ḃeḃis lohoim samito, samtike, “Ivoi,” maii; ¹¹husur avan ideh ḃike, “Ivoi,” maii, gai iḃon mai atenan len nəsaan togolgole.

Nə-maris-kotovi-an

¹²Nukad natit isoḃur hən nəḃitosi van hən gamito, be nomətahun nəḃitosi hən napen len naləḃulat. Avil nuḃatvat viri ke nəḃitoh mai gamito, ale dereh gidat datihol gabag hən datḃepul hən nakemkeman.

¹³Levet, aḃam̄, aGot totabtabuh lan, anatun gail, lukel na-ke-ivoi-an vi təban gaiug.

^b 1.5 Jon 13.34, 15.12, 17